

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 8/6

14 փետրվարի 2017թ.

Քննարկվեց Ա/Ձ Համլետ Հարությունյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 06.12.2016թ. թիվ 337242/06 որոշման դեմ:

Ա/Ձ Համլետ Հարությունյանի գանգատում բերված փաստարկները.

Դիմում-գանգատի առարկան է հանդիսանում ՀՀ ԿԱ պետական եկամուտների կոմիտեի աշխատակազմի իրավաբանական վարչության պետի թիվ 337242/06 որոշումը՝ մեջբերում որոշումից. «Ա/Ձ Համլետ Հարությունյանը 2016թ. 3-րդ եռամսյակի բնապահպանական և բնօգտագործման վճարների հաշվարկ-հաշվետվությունը «Բնապահպանական և բնօգտագործման վճարների մասին» ՀՀ օրենքի 11-րդ հոդվածի 1-ին մասով սահմանված ժամկետում չի ներկայացրել հարկային մարմին», համաձայն ՀՀ օրենսգրքի 169.1 հոդվածի 2-րդ մասի, Համլետ Հարությունյանի նկատմամբ կիրառել վարչական տույժ՝ նշանակել տուգանք 20.000 դրամի չափով:

Հայաստանի Հանրապետության ջրային պետական կադաստրի ջրօգտագործման իրավունքի գրանցման 22.07.2016թ. թիվ 000146 վկայականով Համլետ Հարությունյանին տրված 17.08.2015թ. թիվ 000226 ՋԹ-ի իրավունքը հանձնվել է նրա որդուն՝ Ա/Ձ Արմեն Հարությունյանին, ուստի 2016թ. 3-րդ եռամսյակի բնապահպանական և բնօգտագործման վճարների հաշվարկ-հաշվետվությունը ներկայացվել է հարկային մարմին Արմեն Հարությունյան Ա/Ձ-ով:

Գանգատաբերը համաձայն չէ կիրառվող վարչական տույժի հետ, քանի որ իր փոխարեն Ա/Ձ Արմեն Հարությունյանը ներկայացրել է բնապահպանական և բնօգտագործման վճարների հաշվարկ-հաշվետվությունը և կատարել վճարումները 17.08.2015թ. թիվ 000226 ՋԹ-ով սահմանված չափաքանակների վերաբերյալ:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետի 06.12.2016թ. թիվ 337242/06 որոշման համաձայն Ա/Ձ Համլետ Հարությունյանը 2016թ. 3-րդ եռամսյակի բնապահպանական և բնօգտագործման վճարների հաշվարկ-հաշվետվությունը «Բնապահպանական և բնօգտագործման վճարների մասին» ՀՀ օրենքի 11-րդ հոդվածի 1-ին մասով սահմանված ժամկետում չի ներկայացրել հարկային մարմին: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին

կետով ՀՀ ԿԱ ՊԵԿ աշխատակազմի իրավաբանական վարչության պետի կողմից 06.12.2016թ. ընդունվել է վարչական իրավախախտման գործի վերաբերյալ թիվ 337242/06 որոշումը (այսուհետ նաև՝ Որոշում), որով Ա/Ձ Համլետ Հարությունյանը ենթարկվել է վարչական պատասխանատվության՝ գումարով 20.000 դրամի չափով:

«Բնապահպանական և բնօգտագործման վճարների մասին» ՀՀ օրենքի 11-րդ հոդվածի 1-ին մասի համաձայն՝ վճարողների կողմից վճարների եռամսյակային հաշվարկ-հաշվետվությունները թղթային տարբերակով երկու օրինակից ներկայացվում են համապատասխան լիազոր մարմին գրանցման՝ մինչև եռամսյակին հաջորդող ամսվա 15-ը, եթե սույն օրենքով այլ կարգ սահմանված չէ: Գրանցված հաշվարկ-հաշվետվությունների թղթային տարբերակի երկրորդ օրինակները վճարողները սույն կետով սահմանված ժամկետներին հաջորդող 5 օրվա ընթացքում ներկայացնում են համապատասխան հարկային մարմին: Վճարողների կողմից վճարների եռամսյակային հաշվարկ-հաշվետվությունները համապատասխան լիազոր և հարկային մարմիններ կարող են ներկայացվել նաև էլեկտրոնային եղանակով՝ մինչև եռամսյակին հաջորդող ամսվա 20-ը ներառյալ:

Տվյալ դեպքում գործում առկա է ՀՀ Ջրային պետական կադաստրի ջրօգտագործման իրավունքի գրանցման 22.07.2016թ. թիվ 000146 վկայականը, որով վավերացվել է, որ համաձայն Համլետ Հարությունյանի և Արմեն Հարությունյանի միջև կնքված 11.07.2016թ. իրավունքի փոխանցման պայմանագրի վերջինիս է փոխանցվել Համլետ Հարությունյանի 17.08.2015թ. տրված թիվ 000226 ՋԹ-ի իրավունքը:

Վերոգրյալից հետևում է, որ քննարկվող դեպքում «Բնապահպանական և բնօգտագործման վճարների մասին» ՀՀ օրենքի 11-րդ հոդվածի 1-ին մասով սահմանված՝ վճարողների կողմից վճարների եռամսյակային հաշվարկ-հաշվետվություններ ներկայացնելու պարտականությունը 2016թ. հուլիս ամսից կրել է Արմեն Հարությունյանը, ով և սահմանված կարգով ներկայացրել է 2016թ. 3-րդ եռամսյակի բնապահպանական և բնօգտագործման վճարների եռամսյակային հաշվարկ-հաշվետվությունը:

Հարկ է նշել, որ «Վարչական իրավախախտումների վերաբերյալ» ՀՀ օրենսգրքի (այսուհետ՝ Օրենսգիրք) 8-րդ հոդվածի համաձայն՝ վարչական իրավախախտում կատարած անձը ենթակա է պատասխանատվության իրավախախտումը կատարելու ժամանակ և վայրում գործող օրենսդրության հիման վրա:

Օրենսգրքի 32-րդ հոդվածի 2-րդ պարբերության համաձայն՝ տույժ նշանակելիս հաշվի են առնվում կատարված իրավախախտման բնույթը, խախտողի անձը, նրա մեղքի աստիճանը, գույքային դրությունը, պատասխանատվությունը մեղմացնող և ծանրացնող հանգամանքները:

Օրենսգրքի 279-րդ հոդվածի համաձայն՝ վարչական իրավախախտման վերաբերյալ գործը քննելիս մարմինը (պաշտոնատար անձը) պարտավոր է պարզել՝ կատարվել է, արդյոք, վարչական իրավախախտում, արդյոք տվյալ անձը մեղավոր է այն կատարելու մեջ, արդյոք նա ենթակա է վարչական պատասխանատվության:

Քննարկվող դեպքում վարչական տույժը նշանակվել է այն անձի նկատմամբ, ում կողմից վերը նշված խախտումը թույլ չի տրվել: Միաժամանակ հարկ է նշել, որ Ա/Ձ Համլետ Հարությունյանը պատշաճ ծանուցվել է վարչական իրավախախտման վերաբերյալ գործի քննության օրվա, ժամի և տեղի մասին, սակայն գործի քննությանը չի ներկայացել:

Ղեկավարվելով «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի բ) կետի դրույթներով գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Բեկանել ՀՀ ԿԱ ՊԵԿ աշխատակազմի իրավաբանական վարչության պետի 06.12.2016թ. թիվ 337242/06 որոշումը և կարճել գործը:

Հանձնաժողովի նախագահ՝



Վ. ՄԻՐՈՒՄՅԱՆ